



Bosna i Hercegovina, Federacija Bosne i Hercegovine, Srednjobosanski kanton/Županija
Središnja Bosna, 72270 Travnik

**PRAVILA STUDIRANJA ZA TREĆI
CIKLUS STUDIJA
NA FAKULTETIMA UNIVERZITETA
U TRAVNIKU**

Travnik, mart 2011. godine

Na osnovu člana 5. stav 1. alineja 3. i člana 16. stav 2. alineja 3. Okvirnog zakona o visokom obrazovanju u Bosni i Hercegovini („Sl. glasnik BiH“, br. 59/07 i 59/09), Senat Univerziteta je na sjednici održanoj dana 28.03.2011. godine donio Odluku o usvajanju:

PRAVILA STUDIRANJA ZA TREĆI CIKLUS STUDIJA NA UNIVERZITETU U TRAVNIKU

1. OPŠTE ODREDBE

Član 1.

Pravilima studiranja trećeg ciklusa studija Univerziteta u Travniku uređuje se način, organizacije i modeli izvođenja trećeg ciklusa studija, upis na dati studij, način provođenja ispita i istraživačkog rada, dalje postupak prijave, odbrane i objavljivanja doktorske disertacije, način promocije novih doktora nauka, kao i druga pitanja od značaja za realizaciju trećeg ciklusa studija koji se završava sticanjem naučnog zvanja doktora nauka na Univerzitetu u Travniku.

Član 2.

Pod trećim ciklusom studija treba shvatiti dati studijski program koji je usmjeren na sticanje akademske titule i naučnog zvanja doktora nauka za određenu naučnu oblast, u saglasnosti sa Zakonom, prema datim pravilima i Pravilnikom o korištenju akademskih titula i sticanju naučnih zvanja i sadržaju javnih isprava koje izdaje Univerzitet u Travniku.

Član 3.

Nakon završetka trećeg ciklusa studija student se osposobljava:

- za izgrađivanje akademske karijere na nekoj od naučno nastavnih ili naučnih institucija, odnosno obavljanje visoko specijaliziranih poslova u nekoj od profesija u javnom ili privatnom sektoru;
- za nastavak usavršavanja na postdoktorskim studijama;
- za produbljenu kritičku analizu, modeliranje, evaluaciju i sintezu sadržaja iz područja interdisciplinarnih ili multidisciplinarnih istraživanja;
- za primjenu tehnika i metodologije istraživanja i prilagođavanje procesa istraživanja u području različitih naučnih disciplina;
- za samostalno kreiranje i provođenje istraživanja u polju različitih nauka;
- za promociju progressa u akademskom i profesionalnom kontekstu u polju nauka u okviru društva zasnovanog na znanju i informacijskim tehnologijama;

2. ORGANIZACIJA TREĆEG CIKLUSA STUDIJA

Organizator studija

Član 4.

Visokoškolska ustanova - organizacijska jedinica (u daljem tekstu: organizator/nositelj studija) organizuje, planira, realizuje i izvodi naučni program trećeg ciklusa studija iz naučnih oblasti za koje je akreditovana. Za organizaciju i izvođenje studija, iz prethodnog stava, saglasnost daje Senat Univerziteta u Travniku.

Član 5.

Organizator/nositelj studija podnosi prijedlog i utvrđuje koncepciju za organizovanje studija trećeg ciklusa. Prijedlog za organizovanje trećeg ciklusa studija obavezno sadrži:

- kratki elaborat za organizovanje studijskog programa;
- vrstu i naziv studija;
- nastavni plan i program studija;
- listu svih kolegija sa nosiocima nastave i ECTS studijskih bodova;
- fizičke i ljudske resurse organizatora studija;
- ime i akademske reference odgovorne osobe i svih drugih osoba koje su angažovane u realizaciji studija;
- uslove, nivo i vrstu obrazovanja kandidata koju žele upisati doktorski studij;
- procjenu troškova studija;
- naučno zvanje koje se dodjeljuje završetkom studija.

Prijedlog za organizovanje studija dostavlja se Senatu Univerziteta u Travniku na saglasnost.

Član 6.

Senat Univerziteta u Travniku utvrđuje opravdanost pokretanja studija, optimalnost nastavnog plana i programa i donosi odluku o davanju saglasnosti za izvođenje nastave na modulima trećeg ciklusa studija.

Član 7.

Organizator/nositelj studija može na osnovu međuuniverzitetske saradnje organizovati doktorski studij sa drugim akreditovanim univerzitetima odnosno fakultetima na internacionalnoj ravni, o čemu prethodnu saglasnost daje Senat Univerziteta u Travniku.

Na nastavni plan i program studija iz stava 1. ovog člana, traži se saglasnost nadležnih tijela Univerziteta i svih organizatora studija. Medusobna prava i obaveze aktera u programu trećeg ciklusa regulišu se posebnim ugovorom.

Vijeće dokorskog studija

Član 8.

Vijeće dokorskog studija upravlja trećim ciklusom studija (u daljem tekstu: vijeće studija). Vijeće organizacione jedinice imenuje vijeće studija ako se doktorski studij realizuje i izvodi na organizacionoj jedinici.

Vijeće studija sačinjavaju svi nosioci nastavnog i istraživačkog procesa trećeg ciklusa, uključujući i prodekana za nastavu i prodekana za naučno istraživački rad.

Radom vijeća rukovodi predsjednik Vijeća studija. Na prijedlog Vijeća organizacione jedinice predsjednika Vijeća studija imenuje dekan organizacione jedinice iz reda nastavnika u zvanju redovnog ili vanrednog profesora. Ukoliko doktorski studij interdisciplinarno realizuje više organizacijskih jedinica, predsjednika vijeća studija zajednički imenuju dekani tih organizacijskih jedinica.

Vijeće studija raspravlja i rješava sva pitanja koja se odnose na organizaciju i realizaciju datog ciklusa studija, te se javlja i u funkciji predlagača odluka koje donose stručna tijela Univerziteta i Vijeća organizacionih jedinica, a u vezi su sa doktorskim studijem. Konstituirano vijeće studija započinje sa radom najkasnije 60 dana prije zvaničnog početka nastave na trećem ciklusu.

Organizacija i realizacija doktorskog studija

Član 9.

Na modulima studijskih programa doktorskog studija stiču se zvanja iz naučnih oblasti studija kroz aktivnu participaciju u nastavnom segmentu, naučno-istraživačkom radu, individualnim objavljivanjem naučnih i stručnih radova, izradom i odbranom disertacije.

Član 10.

Treći ciklus studija sastoji se iz sledećih segmenata:

- izbor naučnog polja u kontekstu kojeg će se pisati doktorska teza, što znači dalje definisanje studijskog programa, oblasti i polja;
- aktivna participacija u nastavi i praćenje vrednovanja rezultata kroz definisane procedure provjere znanja,
- prijava i prezentacija izabrane teme, te metodološkog pristupa i naučnog metoda doktorske teze;
- praktičnog i naučno istraživačkog djela na izradi teksta doktorske disertacije;
- objavljivanje dijelova istraživanja u referentnim naučnim časopisima i
- javna odbrana doktorske disertacije.

Član 11.

Studijski programi doktorskog studija diferencirani su na semestre i akademske godine. Studijski program doktorskog studija implementira se i organizuje kroz: nastavu, naučno istraživački rad i izradu i odbranu doktorske teze.

Član 12.

Nastavni i istraživački segment doktorskog studija se implementira preko predavanja, kolegija, radnih grupa, seminara, te drugih definisanih oblika realizacije datog ciklusa. Nastava se izvodi ukoliko na jednom modulu ili predmetu ima više od 5 (pet) studenata.

Mentorska nastava se realizira ukoliko predmet ili kolegij sluša manje od 5 (pet) studenata ili ako je mentorsku nastavu potrebno organizovati zbog karaktera modula ili kolegija.

Samu odluku o obliku realizacije i organizovanja nastave donosi Vijeće studija.

Nastava se izvodi na bosanskom, srpskom ili hrvatskom jeziku. Pored toga nastava se može izvoditi i na engleskom jeziku.

Odluku o načinu izvođenja nastave koja će se organizovati donosi Vijeće studija.

Struktura studijskih programa

Član 13.

Nastavni plan i program doktorskog studija se sastoji iz:

- studijskih oblasti, polja i disciplina;
- obaveznih modula ili kolegija;
- izbornih modula ili kolegija;
- istraživačkog rada (terenski ili praktični rad).

Obavezni moduli ili kolegiji proširuju postojeća specifična znanja doktoranata iz studijskog polja u funkciji odabranog studijskog programa.

Izborni moduli imaju funkciju uvećanja saznanja i spoznaja doktoranta iz specifičnih izbornih modula ili kolegija u odabranom naučnom polju.

Član 14.

Doktorant je obavezan da prije javne odbrane doktorske disertacije položi sve ispite iz datih modula (obaveznih i izbornih) i završi sve ostale provjere znanja.

Član 15.

Vijeće studija u dogovoru sa nosiocima modula ili kolegija utvrđuje zastupljenost pojedinih modula na način da osigura određeni procenat obaveznih i izbornih modula.

Član 16.

Nastavni plan i program doktorskog studija sadrži opšte i posebne uslove koje doktorant treba da zadovolji radi sticanja određenih znanja i to:

- tabelarni prikaz modula ili kolegija klasificiranih prema semestrima i pripadnosti modula prema obaveznim i izbornim;
- kratak opis nastavnog sadržaja modula;
- ukupan broj ECTS bodova za svaki pojedinačni modul;
- šematsku strukturu organizacije nastave: predavanja, diskusije, seminari, kolokviji etc.;
- navođenje uslova za participaciju u nastavi, polaganje ispita i realizaciju pojedinih obaveza iz različitih faza doktorskog studija;
- kao i prikaz strukture doktorske disertacije sa brojem ECTS studijskih bodova i planiranim terminima za početak i završetak njene izrade.

Vrednovanje rezultata rada tokom studija – ECTS studijski bodovi

Član 17.

Opterećenje doktoranta po studijskom programu iznosi 60 ECTS bodova u jednoj akademskoj godini, odnosno 30 ECTS bodova u jednom semestru.

Studijski programi doktorskog studija realizuju se kroz kombinaciju predviđenih oblika kontakt sati nastave, te istraživačkog rada, koji se organizuju saglasno karakteristikama pojedinih studijskih programa, odnosno definisanjem predviđenog ukupnog opterećenja doktoranta po semestrima u vezi sa predavanjima, konsultacijama i samostalnim radom. Nastava se organizuje u I, II, III i IV semestru studija, dok su V i VI semestar predviđeni za rad na disertaciji, izradu i odbranu doktorske teze.

Član 18.

Nastava se u I, II, III i IV semestru organizuje u kontinumu od 20 do 30 radnih sati sedmično tokom 15 sedmica nastave i konsultacija saglasno usvojenim nastavnim planovima i programima.

Naučno istraživačke aktivnosti, kao i izrada doktorske disertacije organizuju se u formi ukupnog individualnog opterećenja doktoranta u rasponu od 250 do 500 sati po semestru. Nastavni plan i program dokorskog studija utvrđuje Vijeće studija, a odobrava ga Vijeće organizacione jedinice uz prethodno dobiveno odobrenje Senata Univerziteta u Travniku.

Član 19.

Doktorska teza se vrednuje u rasponu od 60 do 120 ECTS bodova.

Član 20.

Naučno istraživački rad doktoranta vrednuje se u ECTS bodovima, što se pobliže reguliše nastavnim planovima i programima.

Način polaganja ispita i upis u narednu akademsku godinu

Član 21.

Ukupan broj ECTS bodova stiče se izršavanjem nastavnih obaveza, polaganjem ispita i istraživačkim radom, objavljivanjem tekstova, sudjelovanjem na naučnim skupovima etc. Usvojena znanja i stečene sposobnosti doktoranata kontinuirano se prate i evaluiraju tokom procesa nastavnog i naučnog rada, da bi konačna ocjena bila rezultanta ukupnih aktivnosti tokom semestra što znači: sudjelovanje u diskusijama, prezentacije studija slučaja, pisanje istraživačkih radova, komunikaciju sa mentorom etc.

Student je dužan prije polaganja svih drugih predmeta predviđenih nastavnim planom i programom položiti ispit iz Metodologije naučnog istraživanja.

Ispiti na III ciklusu studija polažu se javno, a mjesto i vrijeme polaganja ispita objavljuju se na oglasnoj ploči i web stranici organizacione jedinice.

Uspjeh doktoranta na obaveznim i izbornim modulima ocjenjuje se ocjenama prema sljedećoj prikazanoj šemi:

- ocjena 5 (F, FX) ne zadovoljava minimalne kriterije i potrebno je znatno više rada
- ocjena 6 (E) zadovoljava minimalne kriterije
- ocjena 7 (D) općenito dobar, ali sa značajnim nedostacima
- ocjena 8 (C) prosječan, sa primjetnim greškama
- ocjena 9 (B) iznad prosjeka, sa ponekom greškom
- ocjena 10 (A) izuzetan uspjeh sa neznatnim greškama

Član 22.

Za ovjeru i upis narednog semestra doktorant je dužan ispuniti uslove iz člana 21, odnosno realizirati obaveze predviđene nastavnim planom i programom za datu studijsku grupu.

Ovjera prethodnog i upis narednog semestra vrši se nakon odslušanih predavanja i izvršenih drugih obaveza predviđenih strukturom studijskog programa iz obaveznih i izbornih predmeta iz prethodnog semestra.

Trajanje trećeg ciklusa studija

Član 23.

Treći ciklus studija traje tri studijske godine (šest semestara), odnosno obim studijskog programa ovog studija vrednuje se sa 180 ECTS bodova.

Studenti koji su upisali doktorski studij trebaju ga završiti u roku od 5 (pet) godina od dana upisa.

Rok iz prethodnog stava može se produžiti najduže za 2 (dvije) godine, računajući od dana isteka zakonom utvrđenog roka za predaju doktorske disertacije.

Kandidatu se rokovi utvrđeni ovim članom mogu produžiti ako postoje opravdani razlozi za produženje, o čemu odluku donosi Vijeće organizacione jedinice na prijedlog Vijeća studija.

3. UPIS NA TREĆI CIKLUS STUDIJA

Član 24.

Upis u treći ciklus studija se vrši po osnovu javnog konkursa koji objavljuje ili Univerzitet u Travniku ili organizacijska jedinica, u zavisnosti od toga ko je nosilac studija.

Upravni odbor Univerziteta, na prijedlog Senata Univerziteta, uz prethodno mišljenje Vijeća organizacione jedinice Univerziteta, utvrđuje broj studenata za upis na studijske programe trećeg ciklusa studija koje organizuje organizaciona jedinica Univerziteta.

Obavijest o upisu studenata za treći ciklus studija objavljuje Univerzitet odnosno organizacijska jedinica u dnevnim listovima na području Bosne i Hercegovine.

Pored toga konkurs za upis u prvu godinu dokorskog studija treba biti objavljen i na webstranici Univerziteta u Travniku odnosno na webstranici organizacione jedinice.

Član 25.

Na postdiplomski doktorski studij mogu se upisati osobe koje su stekle diplomu drugog ciklusa studija ili ekvivalenta (akadenskog zvanja magistra) iz odgovarajuće naučne oblasti. Osoba koja je upisala postdiplomski magistarski studij iz određene nauke i položila sve ispite kao i predala magistarsku tezu, a koju brani do kraja tekuće akademske godine može se upisati na doktorski studij u istoj akademskoj godini.

Član 26.

Osobi koja je stekla titulu magistra nauka prije uvođenja Bolonjskog sistema trocikličnog studija iz naučnih polja koja su relevantna za oblast iz koje se organizuje doktorski studij priznaje se 60 ECTS bodova, a njihov status, prava i obaveze u nastavku studija reguliše organizacijska jedinica posebnim aktom. Preostali obim od 120 ECTS bodova ovi doktoranti trebaju ostvariti u skladu sa ovim pravilima.

Član 27.

Pravo upisa u šesti semestar dokorskog studija imaju i kandidati koji su završili doktorske studije iz određene naučne oblasti, a temu žele prijaviti iz druge oblasti, kao i kandidati koji su položili sve ispite na doktorskim studijama na drugim fakultetima.

Navedeni kandidati se oslobađaju polaganja ispita i pisanja naučnih radova iz nastavnog plana i programa ovog studija. Oni mogu direktno prijaviti temu doktorske disertacije. Za njih važe ista pravila za prijavu i odbranu doktorske disertacije kao i za sve druge kandidate.

Odlukom Naučno nastavnog vijeća svake organizacijske jedinice konkretnije će se definisati programski sadržaji koji su u vezi sa temom doktorske disertacije.

Član 28.

Osoba koja se želi upisati treba da podnese prijavu i priloži potrebnu dokumentaciju.

Ako je broj prijavljenih kandidata veći od broja određenog u konkursu, izbor kandidata koji su ispunili uslove za upis vrši se na osnovu rezultata postignutih na drugom ciklusu studija.

Član 29.

Proceduru rangiranja kandidata prema ostvarenim rezultatima sprovodi komisija za upis koju imenuje Vijeće studija iz reda nastavnika datog studija koji se organizuje.

Komisija za upis dostavlja Vijeću studija organizacijske jedinice konačni izvještaj o rezultatima upisa studenata.

Član 30.

Strani državljani imaju pravo upisa na studij trećeg ciklusa pod jednakim uslovima kao i državljani Bosne i Hercegovine, uz prethodnu nostrifikaciju diplome ranije završenog ciklusa ili stepena studija.

4. PRIJAVA I ODBRANA DOKTORSKE DISERTACIJE

Član 31.

Student početkom II semestra studija bira polje istraživačke teme i mentora iz reda izabranih nastavnika angažovanih na realizaciji doktorskog studija s kojim u toku semestra može definisati užu oblast doktorske disertacije i sadržajni koncept teme, te bira kompatibilnu grupu izbornih predmeta. Mentor se bira iz reda vanrednih ili redovnih profesora uže naučne oblasti.

Član 32.

Mentor se određuje iz reda vanrednih i redovnih profesora, članova akademije nauka, te profesora u zvanju profesor emeritus iz uže naučne oblasti doktorske disertacije.

Dodijeljeni mentor za izradu doktorske disertacije obavezan je da doktorantu pruži pomoć kod izbora teme doktorske disertacije, u ovladavanju nastavnim planom i programom uže naučne oblasti, u preciziranju metodičko didaktičkih specifičnosti mentorskog rada sa doktorantom, pomoć u izboru tema stručnih i naučno istraživačkih radova, da isto tako pomaže pri projektovanju, konceptualizaciji i realizaciji istraživanja koja su sadržana u vremenskom planu realizacije doktorske studija, izrade disertacije po fazama kao i dopuna završenog rada, pripremu kandidata za odbranu disertacije etc.

Član 33.

Prijava prijedloga teme doktorske disertacije obuhvata:

1. radni naslov teze
2. problem i predmet istraživanja
3. sistem glavne hipoteze i pomoćnih hipoteza
4. svrha i ciljevi istraživanja
5. rezultati dosadašnjih istraživanja
6. vlastite predaktivnosti na izradi projekta disertacije
7. metodološki pristup
8. očekivani doprinosi i mogući rezultati istraživanja
9. vremenski plan aktivnosti izrade disertacije
10. popis literature

Član 34.

U toku drugog semestra studija student prijavljuje prijedlog teme doktorske disertacije Vijeću studija, u kojem će navesti pobrojane tačke iz člana 33.

Na osnovu podnesene prijave Vijeće studija obrazuje Komisiju za ocjenu podobnosti kandidata i teme doktorske disertacije, odnosno koja razmatra prihvatljivost prijedloga teme i određuje nastavnika koje će pomoći studentu kod pripreme projekta doktorske disertacije.

Komisija iz stava 2. ovog člana pred kojom se brani projekat ima, u pravilu, predsjednika i dva člana. Jedan od članova komisije je i mentor.

Član 35.

Komisija podnosi izvještaj koji sadrži ocjenu podobnosti kandidata i teme doktorske disertacije Vijeću studija u roku od 30 dana.

Nakon razmatranja izvještaja Vijeće studija dostavlja u roku od 30 dana izvještaj komisije i svoje mišljenje Senatu Univerziteta na potvrdu.

Senat Univerziteta u Travniku potom daje saglasnost na prijedloge Vijeća doktorskog studija organizacijske jedinice u vezi sa :

1. prijavom teme doktorske disertacije;
2. prijedloga kandidata za mentora;
3. sastav komisije za ocjenu podobnosti kandidata i teme doktorske disertacije;
4. izvještaj Komisije za ocjenu podobnosti kandidata i teme doktorske disertacije.

Član 36.

Na osnovu pozitivne odluke Senata Univerziteta u Travniku o prihvatljivosti teme doktorske disertacije i kandidata, doktorant stiče pravo da se upiše u III semestar i nastavi rad na doktorskoj disertaciji, odnosno doktorant može da prijavi odobrenu temu doktorske disertacije.

Član 37.

Student stiče pravo da preda doktorsku disertaciju Vijeću studija u toku VI semestra.

Prije predaje završne verzije doktorske disertacije mentor je dužan da pregleda i izvrši reviziju teksta doktorske disertacije, i na finalnu verziju doktorske disertacije daje saglasnost da ona može ići u narednu proceduru.

Prilikom predaje doktorske disertacije student treba da, kao autor ili koautor, ima objavljen rad u jednom naučnom časopisu sa rezultatima rada na doktorskoj disertaciji.

Ukoliko doktorant ne ispuni uslov iz stava 1. ovog člana neophodno je da podnese posebno obrazloženje o ekvivalenciji objavljenih radova u lokalnim odnosno internacionalnim časopisima, odnosno na konferencijama sa recenziranim zbornicima radova, što Senat Univerziteta u Travniku verifikuje.

Član 38.

Doktorska disertacije treba da bude korektno jezički, stilski i tehnički oblikovana u skladu sa modernim postupcima, tehnikama i metodologijama izrade publikacija u oblasti naučnog i stručnog rada.

Pravilnik o tehničkom izgledu, jeziku na kojem može biti napisana i obradi doktorske disertacije donosi Senat Univerziteta u Travniku.

Doktorska disertacija se dostavlja u deset primjeraka, od kojih se tri primjerka dostavljaju Nacionalnoj i univerzitetskoj biblioteci BiH, a jedan primjerak biblioteci Univerziteta.

Član 39.

Nakon što primi doktorsku disertaciju Vijeće studija utvrđuje da li su ispunjeni svi uslovi i predlaže Senatu Univerziteta komisiju za ocjenu doktorske disertacije.

Komisija za ocjenu i vrednovanje doktorske disertacije iz stava 1. ovog člana ima najmanje tri člana, od kojih najmanje jedan nije u radnom odnosu sa Univerzitetom u Travniku.

Članovi komisije trebaju biti iz naučne oblasti iz koje se brani doktorska disertacija od kojih najmanje dva člana trebaju biti redovni ili vanredni profesori iz uže naučne oblasti iz koje se brani doktorska disertacija, a jedan član može biti iz šire naučne oblasti.

Komisija treba da podnese pisani izvještaj koji sadrži ocjenu doktorske disertacije u roku od 90 dana od imenovanja komisije, odnosno da po isteku od 90 dana podnesu izvještaj o podobnosti disertacije za njenu odbranu sa ocjenom.

Svaki član komisije za ocjenu doktorske disertacije treba da dostavi zaseban izvještaj.

Nakon razmatranja izvještaja Vijeće studija u roku od 90 dana dostavlja izvještaj komisije za ocjenu i vrednovanje doktorske disertacije i svoje mišljenje Senatu Univerziteta Travnik na potvrdu.

Član 40.

Posle prijema izvještaja komisije iz člana 39. datih pravila, dekan organizacijske jedinice omogućava da se izvještaj članova komisije i doktorska disertacija stave na uvid javnosti u roku od 30 dana.

Član 41.

Ako Senat Univerziteta u Travniku ili Vijeće studija vrati tekst disertacije na dopunu odnosno izmjenu, a sam kandidat u roku od šest mjeseci od dana prijema obavještenja o takvoj odluci ne postupi po primjedbama, prijedlozima i sugestijama, smatra će se da je odustao od daljeg rada na disertaciji.

Odbijenu doktorsku disertaciju doktorant ne može ponovo prijaviti.

Član 42.

Donošenjem odluke o prihvatanju doktorske disertacije, Senat Univerziteta u Travniku na prijedlog Vijeća doktorskog studija organizacijske jedinice donosi odluku o imenovanju Komisije za odbranu doktorske disertacije i utvrđuje mjesto, dan i vrijeme odbrane doktorske disertacije. Odbrana doktorske disertacije se organizuje najkasnije 30 dana od dana imenovanja komisije.

Komisija iz stava 1. ovog člana ima pet članova, od kojih najmanje dva nisu u radnom odnosu sa Univerzitetom u Travniku. Članovi Komisije trebaju biti iz naučne oblasti iz koje se brani doktorska disertacija.

Vijeće doktorskog studija organizacijske jedinice informiše javnost preko web stranice Univerziteta u Travniku i oglašavanjem u dnevnim medijima o terminu odbrane doktorske disertacije.

Obavještenje o javnoj odbrani sadrži: ime i prezime doktoranta, naslov doktorske disertacije, sastav komisije za odbranu, mjesto i vrijeme odbrane disertacije.

Član 43.

Prezentacija i odbrana doktorske disertacije pred komisijom ima sljedeći tok:

- predsjednik Komisije iznosi podatke i informacije o doktorantu i daje kratki prikaz rada, posle čega doktorant eksplicira kratki rezime, rezultate i zaključke do kojih je došao, a zatim članovi Komisije postavljaju pitanja na koja doktorant daje odgovore;
- komisija za odbranu doktorske disertacije, nakon provedenog postupka, donosi odluku da li je doktorant odbranio ili nije odbranio disertaciju. Prije konačne odluke o tome da li je disertacija odbranjena ili ne svaki član komisije ocjenjuje odbranu ocjenom od 5 do 10 tako da se na kraju formira prosječna ocjena svih članova komisije uzimajući u obzir i ocjene članova komisije za ocjenu i vrednovanje doktorske disertacije. To su ocjene predikativnog karaktera: summa cum laude (najbolja ocjena), magna cum laude (vrlo dobro), cum laude (dobro), rite (dovoljna), i non rite (nedovoljno).
- predsjednik komisije saopštava odluku da je disertacija odbranjena i ocjenu sa kojom je disertacija odbranjena.
- o toku odbrane doktorske disertacije vodi se zapisnik koji potpisuju svi članovi komisije i zapisničar.

Član 44.

Komisija za odbranu doktorske disertacije podnosi Vijeću studija odnosno Senatu Univerziteta izvještaj o toku i rezultatima odbrane doktorske disertacije.

Doktorska disertacija je javna i treba biti objavljena nakon odbrane.

Doktorant koji odbrani doktorsku disertaciju, treba da posle njene odbrane a najduže u roku od 12 mjeseci objavi tekst doktorske disertacije i tako je trajno učini dostupnom javnosti. Saglasnost da tekst doktorske disertacije ispunjava sve uslove da bude objavljen daje sam mentor.

Tek pošto kandidat priloži u pisanom obliku potvrdu o objavljivanju disertacije tada bi doktorant trebao dobiti diplomu o stečenom akademskom nazivu doktora nauka.

Po odbranjenoj disertaciji kandidatu se izdaje privremena potvrda o odbranjenoj doktorskoj tezi, ali titulu doktor nauka može koristiti tek kada objavi disertaciju u obliku knjige ili u elektronskoj verziji na webstranici univerzitetske biblioteke.

5. DIPLOMA

Član 45.

Diplomu doktora nuka i odgovarajuće naučno zvanje stiče doktorant koji je položio sve ispite predviđene nastavnim planom i programom doktorskog studija, odbranio doktorsku disertaciju prema proceduri koju je propisao Senat Univerziteta u Travniku, i koji je objavio disertaciju u formi knjige ili u elektronskoj verziji na webstranici Univerzitetske biblioteke. Uz diplomu se izdaje i dodatak diplomi radi detaljnijeg uvida u nivo, sadržaj, sistem i pravila studiranja i postignute rezultate tokom studiranja.

6. PROMOCIJA DOKTORA NAUKA

Član 46.

Diploma o stečenoj akademskoj tituli i naučnom zvanju doktora nauka uručuje se prilikom javnog svečanog proglašavanja kandidata za doktora nauka.

Promociju doktora nauka i uručivanje diploma obavlja Rektor Univerziteta u Travniku. Promociji doktora nauka prisustvuju dekani organizacionih jedinica Univerziteta, mentori kandidata i članovi komisija za odbranu doktorskih disertacija.

Član 47.

Dekan organizacione jedinice Univerziteta saopštava biografiju kandidata, njegovu stručnu, naučnu i društvenu aktivnost, stav komisije za odbranu doktorske disertacije i datum odbrane. Mentor, odnosno član Komisije za odbranu doktorske disertacije saopštava naslov i sadržaj disertacije, kao i naučne rezultate do kojih je kandidat došao u toku rada na disertaciji. Promocija novih doktora nuka završava se konstatacijom Rektora Univerziteta u Travniku da su ispunjeni svi uslovi za inaugurisanje kandidata za doktora određene oblasti nauke i uručivanjem diplome.

Član 48.

Doktorant koji je odbranio doktorsku disertaciju upisuje se u matičnu knjigu doktora nauka koju vodi Univerzitet u Travniku.

Član 49.

Do dodjeljivanja diplome doktora nauka izdaje se uvjerenje o odbranjenoj doktorskoj disertaciji.

Tek pošto kandidat priloži u pisanom obliku potvrdu da je objavio doktorsku disertaciju tada bi kandidat trebao dobiti diplomu o stečenom akademskom nazivu doktora nauka.

Uvjerenje da je disertacija objavljena u printnoj ili elektronskoj formi potpisuje mentor kandidata.

Po odbranjenoj disertaciji kandidat dobija uvjerenje o odbranjenoj doktorskoj disertaciji, ali titulu doktor nauka može koristiti tek kada objavi disertaciju u obliku knjige ili u elektronskoj verziji na webstranici univerzitetske biblioteke.

7. PRELAZNE I ZAVRŠNE ODREDBE

Član 50.

Ova pravila trećeg ciklusa se primjenjuju za studente koji studiraju saglasno Bolonjskim principima, a primjenjuje se za generaciju studenata koja se upisala na treći ciklus studija na visokoškolske institucije Univerziteta u Travniku od školske 2011/2012. godine.

Član 51.

Ova pravila stupaju na snagu osmog dana od dana objavljivanja na oglasnoj ploči i Web stranici Univerziteta u Travniku.

Član 52.

Za sva pitanja koja se tiču prava i obaveza studenata, načina organizacije nastave i druga pitanja koja nisu regulisana ovim Pravilima, primjenjivat će se Statut Univerziteta u Travniku.

Član 53.

Svaka organizaciona jedinica zadržava pravo donošenja Pravila za III ciklus studija za tu organizacionu jedinicu, kojima će detaljnije regulisati način studiranja na doktorskom studiju za svoje studente, a koja moraju biti u skladu sa odredbama ovih Pravila i Statuta Univerziteta u Travniku.

Broj: 57/11-c



REKTOR
R. Dadić
Prof.dr Rasim Dadić